

# LOU BRUSC

JOURNAU POUPULARI DE LITERATURO, D'ISTORI E DE SCIENCI  
PAREISSÈNT TOUTEI LEI QUINGENADO

Depausitari majourau pèr Marsiho: *A la Librairie des Bons Feuilletons*, 50, carriero de la Darso 50

**Abounamen :**

1 fr. e miè pèr an pèr touto la Franço.  
Fouero Franço, lou port en subre, ço  
que revèn à 5 fr.

Tout ço que toco lou journau dèn  
èstre manda afranqui à l'Empremarié  
Prouvençalo, 15, carriero d'ou Grand-  
Relogi, à-z-Ais.

Lei plè noun afranqui saran refusa.  
Leis article noun inseri saran pas  
rendu.

## TAULETO

**PASSO-TÈMS.** — Lou pourtaire de Crous - *Emile Giraud.*

**POUESIO.** — Lou parpaïoun e lou mousquioun -  
*E. Imbert.* — Lou faus-lusènt - *E. Jouveau*  
*Alèssi - M. Bourrelly.* — Lou mèu es dous -  
*A. Richier.* — Avans la partènço - *B. Bounet*

**REMEMBRANÇO.** — D'ou 17 au 30 d'Outobre. *L. - A. Gardaire.*

**CROUNICO.** — Lou counours en Lengadò.

**BIBLIOGRAFIO.** — Lou Libre de Toubio.

**FREIETOUN.** — Pèire de Prouvenço e la bello Magalouno.

## PASSO-TÈMS

### LOU POURTAIRE DE CROUS

Èro d'ou tèms qu'èro pas defendu au bouen Diéu de sourti pèr carriero ni à sei prèire de benesi la frucho de la terro. Fasièn lei Rouguesoun, e sabès que dins lei bastido se va à travès campèstre, se passo d'un bèn à l'autre e se fa d'estacièn ei crous em'eis òuretòri dei camin.

La Capello, en terro d'Auruou, fasié coumo toutei leis autro, sei Rouguesoun. Tisté Barièn, subrenouma mèste Mouchoun, pèr que cougnavo dins sei pòchi lei bout de candeleto que soubravon dei òufici, servissié la messo dins un latin que sàbi pas se lou bouen Diéu lou poudié coumprene, basto ague inventa toutei lei lengo, fasié lei founcièn de sacrestan, de companié e lei jour de proucessièn pourtavo la crous.

L'an que vous parli que fasièn adoune lei Rou-

guesoun, la proucessièn destrenavo sei riban à travès lei draio dei bastido, soute lei pinedo, dins lei clapas. Tisté en tèsto, fier e re le coumo l'ouncle Matei que faguè tant de tèms la joio dei Tarascounen, caminavo sèns brunca. Arribon au valat dei Gourgueto e coumo dins la nue avié fa uno grosso chavano, lou vabre èro desgourgant e se vesié gaire mejan que la proucessièn pousquesse lou franqui. Lei jouine aurièn bèn pouscu belèu en gafant un pau s'asarda de passa de l'autre caire, mai pèr lei vièi falié pas li pensa.

Lou cas èro embarrassiéu, èro lou proumié còp que lou paure Tisté se vesié ansin entrepacha dins l'eisercici de sei founcièn. Lou sang li mountavo à la tèsto. Recula èro uno lacheta; prendre soun envanc pèr sauta èro dangié de prendre un ban e lou tèms èro gai....

Alor atucli pèr l'iro, embandis la crous au bèu mitan d'ou valat, en s'escridant :

— Ah ! bèu bouen Diéu ! as fas la sauço, e bèn bèu-la !....

Emile GIRAUD.

## POUESIO

### LOU PARPAÏOUN É LOU MOUSQUIOUN

Fabro courounado au 2 Counours de la Prouvenço à Liou

Toucan un jouine Mousquioun  
Qu'avié pas vist tres cop l'aubeto,  
E qu'ausavo pas luen espandi sis aleto.  
Passo un farot de Parpaïoun